

## **Naqqiut**

Matumuuna akissuteqaat 14. maj-imeersoq taarserneqarpoq  
(Akissuteqaatip aaqqissuussaananerani allangortitsisoqarpoq)

**Aningaasanut inatsimmi konto pingaarneq 64.01.05 naapertorlugu inuussutissarsiutitigut nunaqarfinnut isorliunerusunullu siuarsaanermik tapiissutinik suliassap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-ip ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.**

(Inatsisartunut ilaasorta q Aqqaluaq B. Egede, Inuit Ataqtigiit)

## **Akissuteqaat**

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

## **Siullermeerinnineq**

Naalakkersuisut sinnerlugit Inatsisartunut ilaasorta q, Aqqaluaq B. Egede aalajangiiffigisassatut siunnersuutaanut qujassuteqarfigissavara.

Aningaasanut Inatsimmi konto pingaarneq 64.01.05 nunaqarfinni isorliunerusunilu inuussutissarsiutinik ineriartortitsinermik imaqarpoq.

Kommunini nunaqarfinnut isorliunerusunullu inuussutissarsiortit ineriartortinnissaannut tapiissutissanut aningaasanut inatsimmi konto pingaarneq 64.01.05-imut ukiumi naatsorsuiffimmi 2020-mi koruunit 5,89 mio. immikkoortinneqarput. Taakku kommuninut ataasiakkaanut tamanut koruunit 1,18 mio. missaannik assigiimmik agguataarneqarput, kommunillu kingornatigut agguassassanit suliniutit sorliit aningaasaliissutinik pissarsisinneqassasut aalajangiissapput.

Kommunini inuussutissarsiutinik ineriartortitsinernut tapiissutitut agguagassanngortinneqarsimasut 5,89 mio. kr.-it soqutigineqarluartarput, atorluarneqartarlutillu nunaqarfinni isorliunerusunilu siuarsaasumik. Ukiuni kingullerni tallimani agguassassanit koruunit 19 millionit sinnerlugit akuersissutitut tunniunneqarsimapput, aammalu kommunit toqqartorsimasaannik suliniutinut piviuulluinnartunut atorneqarsimallutik. Aningaasat assersuutigalugu pikkorissarnernut, isumasioqatigiinnernut, attaveqatigiinnermik pitsanngorsaanernut, inuussutissarsiutinik siuarsaanermut iluaqutaasussanik pilersitsinernik aamma Illu Sullivinnik pisinermut

pitsanngorsaanermullu, kiisalu takornariaqarnermut atugassanik suliaqarnermut il.il. atorneqarsinnaapput. Suliniutit suut tapersorneqassanerannik kissaatit nunaqarfiit suleqatigalugit kommuninit nalunaarsorneqartarput.

Aningaasaliissutit agguagassat 2018-imi nunaqarfinni isorliunerusunilu inuussutissarsiutinik ineriartortitsinerni siuarsaaqataapput. Kujataani savaateqarfiit akornanni aqquuserngit annertusarneqarput savaatillit eqeersimaartut ulluinnarni atugaannik oqilisaasseqataasussanik. Kujataani aamma puttasulianik niusarfinnik arlalinnik pilersitsisoqarpoq. Nunap immikkoortuani tamaani takornariat najugaqartullu angallannerannut taakku oqilisaasseqataapput. Kommuneqarfik Sermersuumi nunaqarfinnut agguagassat atorlugit nunaqarfiit siulersuisui isumasioqatigiissinneqarsimapput. Qeqqata Kommuniani agguagassat nunaqarfinnut Napasumut, Atammimmut, Kangaamiunut, Sarfannguanut, Itillimullu iluaqutaasimapput puttasunik niusarfeqalermata. Kommune Qeqertalimmi siursaanissamut annertunerusumik tunngavissaqarluarnerulersimavoq cementiliorfissamut aamma puisit amiinik tigooraaffissamut tapersiissuteqarnikkut Kangaatsiami. Kiisalu agguagassat pissutigalugit Avannaata Kommunian Qeqertani qanoq ililluni qullukkiorfiliornissamik sammisaqarnermut aamma periarfissaqalersimavoq. Ukiup ataasiinnaap ingerlanerinnaani nunaqarfinnut agguagassat pissutigalugit suliniuterpassuit piviusunngortinneqarsinnaanerannik ukua eqqartorneqartut takussutissaminiinnaapput. Suliniutit taakku tamarnik kommunit namminneq toqqagarisimavaat, kingornatigullu Naalakkersuisunit tapiissutinik tunniussivigineqarsimapput. Nunaqarfinni isorliunerusunilu siursaanermik suliaqarnerput 2020-mi nangissavarput, pilersaarutigereerparpullu suliniutit arlallit kommuninik suleqateqarluta tapersersussallugit, soorlu puisinik pilattarfinnik pitsanngorsaaneq, nunaqarfinni isorliunerusunilu innuttaasut inuussutissarsiornermut pikkorissartinneqarnissaat, takornarianut allagartalersuinernut suliniuterpassuillu allat.

Nunaqarfinni isorliunerusunilu suliniutit piviusunngortinneqartarnerannut agguagassat taamaammat aalajangiisuulluinnartarput. Agguagassat aqunneqarneranni taamaammat qitiulluinnarpoq aningaasat nunaqarfinni isorliunerusunilu suliniutinut qinnutigineqartunut atorneqarnissaat. Taamaattumik maannakkut agguassassanik aqutsisoqarnermi iluaqutaasoq tassaavoq kommunit tapersersussallugit kissaatigisaannut nunaqarfinni isorliunerusunilu suliniutinut taakkununnga aningaasaliissutit atornissaat aalajangerneqarlutillu taakkununnga toqqaannartumik tutsinneqartarnerat. Taamaattumik agguassassanit suliniutit sorliit aningaasaliissutinik pissarsissanerat kommunit namminneq aalajangertareerpaat. Taarsiullugu aningaasat kommuninut ukiumut tapiissutit ilaattut tunniunneqartassagaluarpata aningaasat kommunip aningaasaqarnikkut nalinginnaasumik ataatsimut pingaarnersiuneranut ilaatinneqariaannaapput. Taamaalilluni qulakkeerneqarsinnaajunnaassaaq piumasarineqarsinnaananilu aningaasat nunaqarfinnut isorliunerusunullu atugassanngortinneqassasut. Aaqquissuussineq iluaqutaallunilu atorneqarluartoq taamaalilluni tammaratarsinnaavoq.

Kontumi pingaarnermi 64.01.05-imi aningaasat Namminersorlutik Oqartussanit kommunitut nuunneqaraluarpata nunaqarfinni isorliunerusunilu inuussutissarsiutinik ineriartortitsinermut aningaasat atugassanngortinneqarsimasut ikinnerulersinnaapput.

Nunaqarfinni isorliunerusunilu siuarsarnermik pilersitsisoqassasoq tamatta oqaluuserisarpaarput, oqaatsilli qaqutigunnaq kinguneqartitaasarput. Taamaattumik nunaqarfinni isorliunerusunilu piviusunik naammassisaniq siuarsarnermillu pilersitsivissortuusutut aaqqiissutit taakku ilaannik maannakkut maanngaannartitsiniartoqalernera imminut assortuuttuuvoq. Taamaattumik oqaaserisat kinguneqartitsigit, inuussutissarsiorfimmilu aaqqiissut nunaqarfinni isorliunerusunilu inuussutissarsiorfiit ineriartortinnissaannut aningaasaliissutinik toqqaannartumik atugassiaqartitsisoq pigiinnarlutigu. Naalakkersuisut qulaani tunngavilersuutigineqartut toqqammavigalugit nunaqarfiit isorliunerusullu qanoq atugassaqartinneqarnerat eqqarsaatigalugu siunnersuut itigartinneqassasoq inassutigaat.